

Tau e kopana le ya go swana le yona

Kanegoleswa ka Mpho Masipa

Diswantšho ka Alzette Prins

“A re tsome mmogo!” Tau a realo go Phukubje ye Nnyane. “Ge re ka swara tshepe ye nnyane, o ka e tšea – efela ge re ka swara ye kgolo ke ya ka.”

“Go lokile!” a realo Phukubje ye Nnyane.

Bjale ka ge go diragetše, phoofolo ya mathomo yeo ba e bolailego e bile phofu ye kgolo. Tau o be a thabile kudu. “Ke tla tšwela pele go tsoma,” a realo. “E ya o bitše bana ba ka gore ba tle ba tšee nama ye ba e iše gae.”



“Go lokile!” Phukubje ye Nnyane a realo gape, efela Tau e rile go sepela, a bitša ba gagwe bana. “Tau o gopola gore ke setlaela!” gwa sega Phukubje ye Nnyane. “Ke ka lebaka la eng ke swanetše go fepa bana ba gagwe mola ba ka ba bolawa ke tlala?”

Tau ga ya swara selo. Morago ga diiri tše mmalwa o ile a fihla gae, a lapile a bile a swerwe ke tlala. “Nama e kae?” a botšiša Tautshadi, a le gare a latswa kgotswana tša gagwe.

“Nama efe?” a araba ka bodutwana.

Tau o be a befetšwe kudu. “Naa Phukubje ye Nnyane ga a botša bana gore ba ye go tšea nama?” a rora.

“Aowa,” a realo Tautshadi, “ga senke! Re sa swerwe ke tlala!”



Ka pefelo, Tau a leba ntlong ya Phukubje ye Nnyane, efela diphukubje di be di dula godimo ga lebje le le telele, gomme fao go fihlwa ka thapo fela.


“Hei, wena Phukubje ye Nnyane!” Tau a rora. “Re swanetše go bolela!”

“Ke wena mang leina la gago?” gwa goeletša Phukubje ye Nnyane. “O morwa wa mang? O tšwa kae? O ya kae? O nyaka mang? Le gona o mo nyakela eng?”

Tau o ile a tlabega, efela a fetola, “Ke tšile go bona wena. Foša thapo!”

“Go lokile!” a realo Phukubje ye Nnyane. “Ke yeo!” Efela o fošitše thapo ya go dirwa ka matlalo a legotlo, gomme Tau o rile go namela ga nnyane, ya ngwathega. *Ruthuu!* Tau a wela fase. Ka pefelo, a tloga, mola Phukubje ye Nnyane a kwakwaetše ka disego.

Mahlatse ke gore Tau e be e le sebopiwa sa go se fele pelo. “Ka moka re swanetše go nagana,” a realo ka bogale, gomme a ya go emela Phukubje ye Nnyane kua nokeng. Efela e rile ge phukubje ya mahlale a fihla leribeng la meetse, a bona Tau gomme a tšhaba. Tau o ile a mo kitimiša, efela Phukubje ye Nnyane o ile a tsena ka moleteng ka tlase ga mohlare. Tau o ile a iša lerofa le legolo. O latetšwe! O swere fela mosela wa phukubje.



“Tau, Tau,” a realo Phukubje ye Nnyane, “ga se mosela seo, ke modu! Leka go o kgatla ka leswika, o bone ge eba go tla tšwa madi!”

Ka fao Tau a tlogela mosela, gomme a ya go topa leswika. Ka nako yeo, Phukubje ye Nnyane, a sobelela ka moleteng, a šetšwe morago ke mosela wa gagwe. Tau o rile ge a fihla a hwetša a sepetše, a khuta ka morago ga leswika a mo emela.



Go fetile diiri pele Phukubje ye Nnyane a etšwa ka moleteng ka tlhokomelo. O be a sa bone Tau, efela a akanya gore a ka be a le gona kgauswi. Go kgonthiša seo, o ile a goeletša, “Thaa, ke a go bona, kgoši ya ka, le ge o khutile!”

Tau ga se ya fetola. Ya nganga mmele wa yona, ya ikemišetša go hlasela. Efela Phukubje ye Nnyane o tšwile ka moleteng ka pejana a tlogela Tau morago. Phukubje ya mahlale ya phomelela gape!

Go fetile dibeke, efela Tau o be a sa fele pelo. Ka letšatši le lengwe o ile a khukhunetša Phukubje ye Nnyane mo gare ga maswika. O be a thoma go fofa, ge Phukubje ye Nnyane a hebaheba, “Homola! Naa ga o bone tshepe kua? Ke thabela ge o tšile go nthuša! Dula fa ge nna ke dikologa leswika gomme ke tla e rakelela kgauswi le wena.”

Tau ka go se tsebe! A dula – Phukubje ye Nnyane ya tšhaba gape.

Go fetile sebaka sa beke. Phukubje ye Nnyane o be a tseba gore Tau o ile go gahlana le diphoofolo ka moka tša go ba le manaka. “Ke nagana go ya kopanong!” a realo Phukubje ye Nnyane. “Ke duma go thaba!”

Phukubje ye Nnyane o ile a utswa tsina phagong ya dinose, gomme a itirela phere ye botse ya manaka. “Ke kgakantšho ye botse ye!” o ile a myemyela ka kodutlo ge a fihla kopanong. “Ga go yo a tsebago gore ke nna!”

Efela Phukubje ye Nnyane o dirile phošo e tee – o ile a dula kgauswi le mollo. O ile a iketla kudu a ba a otsela. Go se go ye kae manaka a gagwe a letefela gannyane gannyane. Mafelelong a ile a tologa a elela go ba seretse sa tsina mmung.

“Bonang!” gwa goeletša Nare ka pejana. “Ke Phukubje ye Nnyane!”

“Mo swareng!” gwa rora Tau, efela lešata le ile la tsoša Phukubje ye Nnyane gomme ka bjako a khuta ka tlase ga leswika la go lekelela. “Thušang!” a goeletša. “Leswika le le a nkwela!”

“Ke wa ka bjale!” gwa sega Tau, a retologa gore a sware pala gore a thibele leswika a tle a kgone go swara Phukubje ye Nnyane. Agaa! Ge a retologa, Phukubje ye Nnyane a sepela, a kwakwaela ka sesego se segolo. O hlalefeditše Tau gape!

